

ALL INDIA RADIO

RNU : KOLKATA

Bengali Text Bulletin

Date: 08.10.2023

Time: 7.50 P.M.

বিশেষ বিশেষ খবরঃ-

১) পুরসভায় নিয়োগ দুর্নীতির তদন্তে সি বি আই আজ ফিরহাদ হাকিম ও মদন মিত্রের বাড়ি সহ ১২-টি জায়গায় সকাল থেকে তল্লাশি চালায়।

শুধু হেনস্থা করার জন্যই তাঁর বাড়িতে সিবিআই তল্লাশি চালিয়েছে বলে পুর ও নগরোন্নয়ন মন্ত্রী অভিযোগ করেছেন।

২) রাজভবনের গেটের বাইরে ১৪৪ ধারা জারি থাকা সত্ত্বেও তৃণমূল কংগ্রেস কিভাবে মঞ্চ বেঁধে বিক্ষোভ দেখাচ্ছে, তা জানতে চেয়ে, রাজভবন নবান্নে চিঠি দিয়েছে।

আজই সন্ধ্যায় কলকাতায় ফিরেছেন রাজ্যপাল।

৩) রাজনৈতিক উদ্দেশ্যে কেন্দ্রের বিরুদ্ধে বঞ্চনার অভিযোগ করা হচ্ছে বলে কেন্দ্রীয় অর্থ প্রতিমন্ত্রী পঙ্কজ চৌধুরী মন্তব্য করেছেন।

৪) উত্তরবঙ্গে প্রাকৃতিক বিপর্যয়ে ক্ষতিগ্রস্তদের জন্য পরবর্তী পদক্ষেপ, সবার সঙ্গে আলোচনার ভিত্তিতে নেওয়া হবে বলে রাজ্যপাল সিভি আনন্দ বোস জানিয়েছেন।

oooooooooooooooooooo

পুরসভায় নিয়োগ দুর্নীতির তদন্তে সি বি আই আজ সকাল থেকে রাজ্যের পুর ও নগরোন্নয়ন মন্ত্রী তথা কলকাতার মেয়র ফিরহাদ হাকিমের চেতলার বাড়ি এবং কামারহাটির তৃণমূল কংগ্রেস বিধায়ক মদন মিত্রের ভবানীপুর ও দক্ষিণেশ্বরের ফ্ল্যাট সহ ১২-টি জায়গায় তল্লাশি চালায়। সাড়ে ৯ ঘণ্টা পর সন্ধ্যে সাড়ে ৬-টা নাগাদ ফিরহাদ হাকিমের বাড়ি থেকে বেরোন সি বি আই আধিকারিকরা। পুরো সময় বাড়ির সামনে পাহারায় ছিল কেন্দ্রীয় বাহিনী। কেন্দ্রীয় সংস্থার বিরুদ্ধে মানসিক নির্যাতনের অভিযোগ করেছেন ফিরহাদ কন্যা।

অন্যদিকে, মদন মিত্রের আইনজীবীর দাবি, ভবানীপুরের বাড়িতে তল্লাশি চালিয়ে কোন নথি নিয়ে যায়নি সিবিআই। প্রায় ৬ ঘণ্টা ধরে তল্লাশি চলে। এর পাশাপাশি হালিশহর, উত্তর দমদম, কাঁচরাপাড়া, নিউ ব্যারাকপুর ও কৃষ্ণনগর পুরসভার প্রাক্তন এবং টাকী ও দমদম পুরসভার বর্তমান চেয়ারম্যানের বাড়িতে হানা দেয় সিবিআই-এর দল।

এর আগে খাদ্যমন্ত্রী রথীন ঘোষের মধ্যগ্রামের বাড়িতে ১৯ ঘণ্টার বেশি তল্লাশি চালিয়েছিল ইডি। দীর্ঘদিন মধ্যগ্রাম পুরসভার চেয়ারম্যান ছিলেন তিনি।

শিক্ষক নিয়োগ দুর্নীতি মামলায় অয়ন শীল গ্রেফতার হওয়ার পর তার বাড়িতে ও অফিসে তল্লাশি চালিয়ে ২০১৪ থেকে ১৮-র মধ্যে বিভিন্ন পুরসভায় কর্মী নিয়োগে দুর্নীতির বিষয়টি প্রকাশ্যে আসে।

০০০০০০০০০০০০

এদিকে, শুধু হেনস্থা করার জন্যই তাঁর বাড়িতে সিবিআই আজ তল্লাশি চালিয়েছে বলে ফিরহাদ হাকিম অভিযোগ করেছেন। সন্ধ্যায় সাংবাদিকদের

সামনে তিনি প্রশ্ন তোলেন, পুরসভায় নিয়োগ প্রক্রিয়ার সঙ্গে তাঁর কোন সম্পর্ক না থাকা সত্ত্বেও কেন এই অপমান ?

(BYTE)

অন্যদিকে, মদন মিত্র জানান, তাঁর কাছে যা যা জানতে চাওয়া হয়েছে, তিনি সবই জানিয়েছেন। ব্যাকের নথিপত্র দেখিয়েছেন।

০০০০০০০০০০০০০০

রাজ্যপাল সি ভি আনন্দ বোস উত্তরবঙ্গ থেকে কলকাতায় ফেরার আগেই রাজভবনের গেটের বাইরে ১৪৪ ধারা জারি থাকা সত্ত্বেও তৃণমূল কংগ্রেস কিভাবে মঞ্চ বেঁধে বিক্ষোভ দেখাচ্ছে, সেই প্রশ্ন তুলে রাজভবনের তরফে নবান্নে চিঠি পাঠানো হয়েছে। মুখ্য সচিব হরিকৃষ্ণ দ্বিবেদীকে চিঠি পাঠিয়ে এব্যাপারে জানতে চাওয়া হয়েছে বলে রাজভবন সূত্রে জানা গেছে।

১-শো দিনের কাজ ও আবাস যোজনায় কেন্দ্রের বিরুদ্ধে বঞ্চনার অভিযোগে রাজভবনের উত্তর গেটের সামনে অভিষেক বন্দ্যোপাধ্যায় ধর্না অবস্থান শুরু করার দিন থেকেই বিজেপি, ১৪৪ ধারা জারি থাকা এলাকায় এর অনুমতি পাওয়া নিয়ে প্রশ্ন তোলে।

এদিকে, আজই সন্ধ্যায় কলকাতায় ফিরেছেন রাজ্যপাল।

০০০০০০০০০০০০০০০০

কেন্দ্রীয় অর্থ প্রতিমন্ত্রী পঙ্কজ চৌধুরী বিজেপির সাংগঠনিক কার্যক্রমে অংশ নিতে আজ পূর্ব বর্ধমানের রায়নায় যান। এর আগে মেরি মাটি মেরা দেশ কর্মসূচিতে

রায়নার সুবলদহ গ্রামে বিপ্লবী রাজবিহারী বসুর জন্মস্থান থেকে মাটি সংগ্রহ করেন তিনি। শ্রদ্ধা জানান রাসবিহারী বসুর প্রতি।

পরে সাংবাদিকদের মুখোমুখি হয়ে পৌর দুর্নীতির তদন্তে তৃণমূল নেতা মন্ত্রীদেব বাড়িতে সিবিআই ইডি হানা প্রসঙ্গে তিনি বলেন, সিবিআই, ইডি, আয়কর বিভাগ সব কটি স্বতন্ত্র সংস্থা, তারা ভারতীয় জনতা পার্টির এজিয়ারে নেই।

কেন্দ্রীয় সরকারের কাছ থেকে রাজ্যের পাওনা আদায় নিয়ে তৃণমূল সাংসদ অভিষেক বন্দ্যোপাধ্যায়ের ধর্না প্রসঙ্গে কেন্দ্রীয় প্রতি মন্ত্রী বলেন, কেন্দ্রের বিশেষ দল সরকারী প্রকল্পগুলির বিষয়ে খতিয়ে দেখতে রাজ্যে এসে প্রচুর গরমিল পায়।। রাজ্যকে এ নিয়ে তদন্ত করে রিপোর্ট দিতে বলা হয়েছিল।। গত তিন বছর ধরে পশ্চিমবঙ্গ সরকার তা দেয়নি।

কেন্দ্রের বিরুদ্ধে রাজনৈতিক উদ্দেশ্যে অভিযোগ আনা হচ্ছে বলেও মন্তব্য করেন তিনি।

(বাইট)

০০০০০০০০০০০০০০০০

তৃণমূল কংগ্রেসের সাধারণ সম্পাদক অভিষেক বন্দ্যোপাধ্যায় তাঁর ব্যক্তিগত ফোন নম্বর প্রকাশ্যে আনায় দলের লাভ হয়েছে বলে বিজেপি-র রাজ্য সভাপতি সুকান্ত মজুমদার দাবি করেছেন। আজ কলকাতায় এক সাংবাদিক বৈঠকে তিনি বলেন, অভিষেকের এই আচরণ তাঁর রাজনৈতিক পরিপক্বতার অভাবকেই সামনে এনেছে।

(বাইট)

০০০০০০০০০০০০০০০০

রাজ্যপাল সি ভি আনন্দ বোস আবারও প্রাকৃতিক বিপর্যয় এড়াতে পরিবেশ রক্ষার পক্ষে জোরালো সওয়াল করেছেন। মেঘভাঙা বৃষ্টিতে সিকিমের লোনাক হ্রদ

উপচে তিস্তার হড়পা বানে ক্ষতিগ্রস্ত কালিম্পং-এর তিস্তা বাজার এলাকা ঘুরে দেখার পর আজ তিনি বলেন, বিধ্বংসী বন্যায় দুর্গত মানুষজনের সঙ্গে কথা বলতেই তাঁর গ্রাউন্ড জিরোয় আসা। এখানকার মানুষের স্বার্থে পরবর্তী পদক্ষেপ কি হওয়া প্রয়োজন, তা নিয়ে কেন্দ্রীয় সরকার এবং সংশ্লিষ্ট সবার সঙ্গে কথা বলবেন তিনি।

(বাইট)

০০০০০০০০০০০০০০

সিকিমের প্রাকৃতিক বিপর্যয়ে নিহত সেনা জওয়ান গোপাল মাডিডর দেহ আজ বীরভূমের ময়ূরেশ্বর নান্দুলিয়ার বাড়িতে এসে পৌঁছলে শোকের ছায়া নামে। সমবেদনা জানাতে গোপাল মাডিডর বাড়িতে যান জেলা পরিষদের সভাপতি কাজল শেখ। আর্থিক সাহায্যও দেওয়া হয় পরিবারকে।

উল্লেখ্য, ২০১৪ সালে গোপাল মাডিড ভারতীয় সেনাবাহিনীতে যোগ দেন। মেডিকেল বিভাগে কর্মরত ছিলেন তিনি।

এদিকে, বহু মানুষ এই বিপর্যয়ের পর থেকে নিখোঁজ। কোচবিহারের পানিশালা এলাকার বাসিন্দা রফিকুল হক, সিকিমের লাচুঙ্গে মিস্ত্রির কাজ করতেন। গত মঙ্গলবার রাতের পর থেকে তার সঙ্গে যোগাযোগ করা যাচ্ছে না। চরম দুশ্চিন্তায় পরিবার।

০০০০০০০০০০০০০০

বিশ্ব ঐতিহ্য হিসেবে ইউনেস্কোর স্বীকৃতি লাভের পর শান্তিনিকেতনে রবীন্দ্র স্মৃতিবিজড়িত স্থানগুলিকে রক্ষা করতে বিশ্ব ভারতীর উপাচার্য বিদ্যুৎ চক্রবর্তী আজ পথে নামেন। হাতজোড় করে যান চালকদের গতি নিয়ন্ত্রণের অনুরোধ জানান তিনি।

শান্তিনিকেতন পোস্ট অফিস মোড় থেকে কালিসায়র পর্যন্ত সাড়ে তিন কিলোমিটার রাস্তার দায়িত্ব এখন রাজ্য সরকারের হাতে। এর নিয়ন্ত্রণ বিশ্বভারতীকে ফিরিয়ে দেওয়ার অনুরোধ জানিয়ে একাধিকবার মুখ্যমন্ত্রীকে চিঠি দিয়েছেন উপাচার্য।

অন্যদিকে, শান্তিকেতনের বাসিন্দারা এর বিরোধিতা করে মুখ্যমন্ত্রীকে পাল্টা চিঠি দেন। তাদের বক্তব্য, বিশ্বভারতীর হাতে রাস্তার দায়িত্ব তুলে দেওয়া হলে তার অপব্যবহার করা হবে। এই পথের দু-পাশে রয়েছে শতাব্দী প্রাচীন রবীন্দ্র ঐতিহ্য মণ্ডিত বিভিন্ন স্থান। ভারী যান চলাচলে সেগুলির ক্ষতির আশঙ্কা।

০০০০০০০০০০০০০০

রাজ্য প্রাণী হিসেবে স্বীকৃত মেছো বেড়াল বা বাঘরোলের অবলুপ্তি ঠেকাতে বন দফতর ঝড়খালির ওয়াইল্ড লাইফ পার্কে তার সংরক্ষণের ব্যবস্থা করতে চলেছে। বনাদিকারিক মিলন মন্ডল আমাদের প্রতিনিধি অভিজিৎ চক্রবর্তীকে জানিয়েছেন, সেখানে ভোঁদরের প্রজননের কর্মসূচীও নেওয়া হচ্ছে, যাতে এই প্রাণী বিলুপ্ত না হয়ে যায়।

(বাইট – মিলন মন্ডল)

উল্লেখ্য, আজই শেষ হচ্ছে জাতীয় বন্য প্রাণ সপ্তাহ।

০০০০০০০০০০০০০০

আলিপুরদুয়ারের মাদারিহাট-বীরপাড়া ব্লকের তাসাটি চা বাগানের ঘাসি লাইনের বাসিন্দাদের দাবি মেনে আজ ছাগলের টোপ দিয়ে ওই এলাকায় লুকিয়ে থাকা

এক চিতাবাঘকে খাঁচাবন্দি করেছেন বনদপ্তরের কর্মীরা। এরপর সেটিকে জঙ্গলে ছেড়ে দেওয়া হবে।

০০০০০০০০০০০০০০০০

পশ্চিম বর্ধমানের দুর্গাপুরের বিধাননগর স্টীল পার্কে দোকান তৈরির কাজে নিযুক্ত দুই রাজ মিস্ত্রি বিদ্যুতের হাইটেনশন তারের সংস্পর্শে এসে তড়িদাহত হন। দুজনেরই শরীরের বেশকিছুটা অংশ ঝলসে গেছে। তাদের একজনকে বিধাননগরের একটি বেসরকারী হাসপাতালে এবং অপরজনকে দুর্গাপুর মহকুমা হাসপাতালে পাঠানো হয়। দুই রাজ মিস্ত্রির-ই বাড়ি মুর্শিদাবাদের ডোমকলে।

০০০০০০০০০০০০০০০০

কামদুনি ধর্ষণ ও হত্যা মামলায় দোষী সাব্যস্তদের সাজা বহাল রাখার দাবিতে বিজেপি মহিলা মোর্চা আজ বাঁকুড়া শহরের মাচানতলা মোড়ে বিক্ষোভ দেখায়। উপস্থিত ছিলেন বিধায়ক নীলাদ্রি দানাও। মহিলা মোর্চার জেলা সভানেত্রী ববিতা বন্দ্যোপাধ্যায় অভিযোগ করেন, শাসক দল তৃণমূল কংগ্রেস, কামদুনির মতো জঘন্য হত্যাকাণ্ডে জড়িতদের বাঁচানোর চেষ্টা করছে।

০০০০০০০০০০০০০০০০

গঙ্গাজলঘাটির পর বাঁকুড়ার বিজেপি সাংসদ কেন্দ্রীয় শিক্ষা প্রতিমন্ত্রী সুভাষ সরকারের বিরুদ্ধে এবার ছাতনায় টায়ার জালিয়ে বিক্ষোভ দেখালেন দলীয় কর্মী ও

কর্মকর্তাদের একাংশ। তাদের অভিযোগ চাটুকারদের নিয়ে দল পরিচালনা করছেন তিনি, কর্মীদের উপেক্ষা করছেন।

oooooooooooooooo

আসন্ন দুর্গা পুজোয় দর্শনার্থীদের মন্ডপে প্রবেশের সুবিধার জন্য কলকাতা পুলিশ এবার ডিসপ্লে বোর্ড বসানোর সিদ্ধান্ত নিয়েছে। এর সাহায্যে কতক্ষন লাইনে অপেক্ষা করতে হবে, তা জানানো সম্ভব হবে। পুলিশ কমিশনার বিনীত গোয়েল জানিয়েছেন, দর্শনার্থীরা যাতে ভালোভাবে ঠাকুর দেখতে পারেন সেজন্য প্রয়োজনীয় সব ব্যবস্থা করা হচ্ছে। উদ্যোক্তারাও বেশ কিছু প্রস্তাব দিয়েছেন। সেগুলি খতিয়ে দেখা হবে।

রাত দুটো থেকে সকাল ৬টা পর্যন্ত শহরে বাড়তি পুলিশ মোতায়েন থাকবে। মহিলাদের সুরক্ষার জন্য চব্বিশ ঘন্টার একটি বিশেষ হেল্প লাইন খোলা হয়েছে। এর নম্বর হলো ৭৪৪৯৯০০১১১।

oooooooooooooooo

oooooooooooooooo

oooooooooooooooo